




Literatura den Bon Dia

Ernesto E. Rosenstand



TUR COS A KEDA ATRAS

E tabatin varios hobby cu tabata percura pa e keda su cas luga di bai core caya. Ni tempo cu e tabata soltero e tabata sa haci esei. Y pa complace cu Carmen e tabata sali de bes en cuando cu ne. No por a keda continuamente den cas. De bes en cuando mester busca manera pa diverti.

Den tur cos cu e tabata haci bo tabata ripara cu e tabata stima Carmen. E tabata busca manera pa complace tur ora. P'e Carmen tabata tur cos. Mala lenga tabatin otro opinion, nan tabata bisa cu e tabata mucho bon p'e.

Segun nan Carmen tabatin mester di un homber pa domin'e y no uno zwak manera Jacinto.

Despues di a casa nan a bai biba na e cas di e wela. Nan a dech'e masha bunita mes. Nan tabata sa cu despues di tempo lo e keda pa Carmen. Y dor di esei nan a drech'e manera nan tabata kier.

Nan a gasta hopi placa riba dje. Nan kier a drech'e na nan smak. Y modernis'e, ya cu tabata basta bieu. Y e tabata pidiendo cambionan. Nan a pone bentana nobo, flur di mosaik, dak di panchi y a verfe tur su grandi. Nan a cambie completamente. El a keda casi nobo. Manera nan tabata desea.

Anto loke tabata hopi importante tabata cu el a keda na nan smak. Nan tur dos a keda encanta con e cas a keda despues di tur e drechamento. El a keda net loke nan tur dos tabata desea, un cas unda nan por a biba felis, keto y sin ningun sorto di preocupacion. Y no di e grandi ei. Net bon p un pareha cu a caba di casa.

Nan a muebl'e no di luho, ma tog nechi. Casi tur cen cu nan tabatin gespaar nan a gasta riba dje. Den esaki nan no a cremencha nada.

Anochi despues di trabou, Carmen a sigui traha, nan tabata sinta den sala comenta tur loke a pasa e dia ei y traha plannan pa futuro. Y comborsa loke tur pareha pas casa ta haci.

Nan tabata sali tin biaha bai bishita algun amigo, ma no mucho. De bes en cuando nan tabata ricibi tambe algun di nan. Esaki mes no tabata sa pasa asina hopi. Mas tanto nan tabata bai cerca Maria. Famia di esaki a yuda masha hopi den preparacion pa e fiesta di casamento.

Nan tabata sa bai tambe na cas di e mayornan di Jacinto, como tambe na cas di su mayornan. Nan tabata gosa na nan manera. Ma en todo caso nan tabata hiba un miho bida di loke nan a hiba den nan hubentud.

Futuro tabata musta bunita. Nan tabata sa masha bon cu perdicion di hopi matrimonio ta cu nan kier competi cu otro. Bai aki aya. Cumpra cosnan cu no tin mester. E hendenan aki no kier keda atras. Resultado ta cu nan ta hinca nan curpa den debe cu ta mara nan pa añanan largo.

Jacinto y Carmen tabata un pareha cu no tabata gusta e sorto di cosnan aki. Nan no tabata miembro di

ningun club. For di diferente hende nan a tende cu club tabata pa hopi hende perdicion. Y p'esei nan a dicidi pa no join ningun. De bes en cuando nan tabata sa bai un fiesta o bai hunga bingo. Casino, masha poco.

Ma bira miembro di un ke otro club ningun di dos tabata sinti pa haci esei.

20

Manera nan tabata biba nan tabata felis. Nan tabata busca diverticion di otro manera. Esei pasobra tin biaha nan tabata sinti cu mester haci algo. No por keda traha dia aden dia afo. Tin biaha nan tabata sa bai un cine.

Y si tabatin bon comedia nan tabata sa bai tambe. No di e mucho ei. Maske nan tabata prefera mas comedia cu cine. De bes en cuando nan tabata sa bai balia. Nan tabata haci esaki na un di e salanan cu tabatin den stad.

Ma esei mes tabata masha poco. Delaster tempo e ambiente den e salanan aki no tabata co'i gaba. Especialmente ora tabatin un ke otro fiesta e ora e salanan tabata yen yen di hende.

E ora tabata masha anima. E ora nan tabata sa bai cu nan amistadnan. Y esei a pasa tambe tempo cu Carnaval a drenta den sanguer di tur hende aki na Aruba. Den esun di nan tambe.

Temporada di Carnaval tabata organisa fiesta practicamente tur caminda. Esei mes tabata tenta hende pa tambe participa den e festividadnan aki. Y hendenan tabata prepara en grande pa e bunita fiesta aki.

Y masha hopi hende tabata bai balia pasa bon. Tur caminda tabatin fiesta y tur parti bo por a ripara cu pronto lo ta Carnaval. Kentura di Carnaval ta pegahoso, contagioso.

Den e diferente clubnan bo por a bai gosa e fiesta aki cu tur aña tabata bolbe cu mas y mas entusiasmo. Manera ta conoci, fiesta di Carnaval ta fiesta di locura. Hendenan ta sinti nan masha los mes.

Riba un diasabra anochi Carmen cu Jacinto a bai un di e fiestanan aki. Esei no tabata prome biaha cu nan a haci esei. E biaha aki nan a dicidi di bai disfrasa. No cu disfras caro, ma e intencion tabata pa pasa bon.

Nan disfras no tabata di e luhoso ei. Ma si uno cu bo no por a reconoce nan asina asina. Dor di esei bo por gosa mas. Ya cu ningun hende sa ki co'i kens ta haciendo. E fiesta mes tabata hopi bon.

Hendenan presente a bin pa gosa. Esei bo por a ripara masha bon mes.

Fiesta tabata hopi anima. Tabatin masha hopi hende ya cu e tabata un lugar hopi popular pa hubentud.

Maske aki aya bo tabata haya algun hende grandi cu tambe tabata sa bai. Esakinan tabata haci menos desorden. Nan tabata balia un poco mas decente cu e otro nan.

Nan tabatin suerte di haya un mesa unda nan a sinta cu varios amigo y amiganan.